

Nil tam munifico, tam Meccenate potenti,
 Proficies: alacer quos regit, ille tegit.
 Cede miser, fugito metuendi principis iras:
 Vnguibus an nescis quid valet iste Leo?
 Inde Leouicias fertis ROSEBERGIA Musas
 Ornat, & hospitio suscipit ampla domus.
 Irriguosq; Deas non inuida ducit in hortos:
 Huc veniunt Charites, doctus Apollo venit.
 Is Citharam pulsat, modulantur carmina Musæ:
 Trina Charis lepidis motibus vrget humum.
 Inflat Atlantiades dextræ moderamine buxum:
 Et philomela sonat blanda suaue melos.
 Cynthia Parthenium, Tritonia Cecropis arces
 Deserit, & celebri gaudet adesse choro.
 Aspicit hæc myrto latitans Cypris, ægræq; mœret
 Se quoq; virgineum non retinere decus.
 Hos auida lusus dum percipit aure CVPIDO:
 Arcus humi cecidit, spicula faxq; iacent.
 Nullum numen abest quo Regia gaudet olympi:
 Quodlibet hos cœtus condecorare parat.
 Mars galeam, sæuum ponis Neptune tridentem,
 Iupiter abiecto fulmine mitis adest.
 Elysi nemoris Pluto venit arbiter, Aurum
 Dextra gerit Tellus quod dedit ima Deo.
 Bacchus & alma Ceres secum sua munera portant,
 Ambrosiamq; Ceres, Nectar lacchus habet.
 Naiades ecce rosas, Libanotin, amaracon addunt
 Herbas quas oculi quasq; probarit odor.
 Pocula circumfert Ganymedes pulcher & Hebe
 Grandia Mulciberis pocula torta manu
 Solus abest Momus, conuiuia læta Deorum
 Culpat, & obscura mœstus in æde sedet.
 Liuor iners horti studuit perrumpere septum
 Sed plorans, densis sentibus ictus, abit.
 Salue clara domus Roseberga, fouere Camœnas
 Perge, tibi solidum perge parare decus.
 Hospitibus Musis melius tua gloria crescet:
 (Si tibi forte placet posteritatis honos)
 Quam si te decorent fastosa palatia Regum:
 Scilicet illa breui tempore pompa manet.
 Incluta perpetuos sed gloria durat in annos
 Stelligero Vranie quam dedit alta polo.
 Hospitio diuæ o felix domus & bona sedes:
 Dextera te superum protegat atq; beet.
 Mulciber & Pluto faueant, faueat tibi Maiæ
 Filius, & cornu Copia plena graui.

Rosebergij, quorum
 sumptibus excusa
 sunt ephemerides et
 tabula eclipticum.

Allusio ad Metalla
 Rosebergia.

IN